

四庫全書

集部

欽定四庫全書

元詩選初集卷五十八

庶吉士顧嗣立編

倪瓚清閟閣橐

瓚字元鎮無錫州人其先世以貲雄一郡元鎮
不事生產強學好修刻意文史所居有雲林堂
蕭閒館清閟閣諸勝饒介之稱其閣如方塔三
層疏窗四眺遠浦遙巒雲霞變幻彈指萬狀窗
外巉巖怪石皆太湖靈壁之奇高於樓堞松篁

蘭菊龍蔥交翠風枝搖曳涼陰滿苔閣中藏書
數千卷手自勘定三代鼎彝名琴古玉分列左
右時與二三好友嘯咏其間性好潔見俗士避
去如恐浼盟類易水振拂巾服日以數十計居
前後樹石頻令洗拭書畫蕭疎秀挺稱其為人
至正初天下無事一旦盡斥賣其田產得錢以
與貧交疎族或竊笑之及兵興富家多被剽掠
元鎮扁舟箬笠往來湖泖間人乃服其前識明

洪武七年始還鄉里時年七十有四矣寄居其
姻鄒惟高竟卒於鄒氏嘗自謂嬾瓚亦曰倪迂
長樂王賓志其旅葬吳人周南老志其墓皆曰
元處士雲林先生句曲張雨錢塘俞和嘗繕寫
其橐藏之論者謂如白雲流天殘雪在地楊鐵
厓曰元鎮詩才力似腐而風致特為近古吳匏
菴曰倪高士詩能脫去元人之穠麗而得陶柳
恬澹之情百年之下試歌一二篇猶堪振動林

木也

春日雲林齋居

饒介之云堂扁雲林二字雲字正
夢天台白雲寺額林字摹廬山東

林寺額皆右
軍得意筆也

池泉春漲深逕苔夕陰滿諷咏紫霞篇馳情華陽館晴
嵐拂書幌飛花浮茗盃階下松粉黃窗閒雲氣暖石梁

蘿薦垂翳翳行蹤斷非與世相違冥棲久忘返

此詩集
中又載

改本云臨池春流駛埽地夕陰滿正襟味道言超遠生
溪館嵐嶺當書榻煩襟一舒散靡靡松花黃逕逕雲氣
暖石梁青苔合於馬人迹斷故非與
世殊冥棲遂忘返元音所載即此

雨中寄孟集

英英西山雲翳翳終日雨清池散圖文空林絕行屨野
性夙所賦好懷誰共語燒香對長松相與成賓主

聽袁子方彈琴

蕙帳凝夕清高堂流月明芳琴發綺席列坐散繁纓迴
翔別鵠意縹緲孤鸞鳴一寫冰霜操掩抑寄餘情

贈天寧福上人

荆溪霜落後銅官日出初自櫛頭上髮更理篋中書上

人從定起咏言方繞除解後發微笑幻身同太虛

為方厓畫山就題

摩詰畫山時見山不見畫松雪自纏絡飛鳥亦閒暇我
初學揮染見物皆畫似郊行及城遊物物歸畫筭為問
方厓師孰假孰為真墨池挹涓滴寓我無邊春

奉謝張天民先生

鳴鴈將北歸襄回舊棲處江湖春水多欲去仍回顧稻
梁豈余謀矰繳非所慮猶為氣機使暄冷逐來去寥寥

天宇寬彼此同一寓風萍無定蹤易散聊為聚君看網
中魚在疚猶相照

夜泊芙蓉洲走筆寄張鍊師

芙蓉猶滿渚疎桐已殞霜泊舟菰蒲中吳山隱微陽因
懷靜默士竹林閔玄房煮茗汲寒澗燒丹生夜光憶與
鄭郊輩閒咏步修廊時子有所適顧瞻重尚羊庭下生
苔蘚牖間繡詩章奕勢鄭老勝酒榼郊生將雅歌雜談
諧列坐飛羽觴子歸日已晚棗栗亦傾筐揮手輒謝別

莫宿荒城傍遲明超所期待子鄭公堂晨往遂至昏企
望徒俵俵乃嗟仙真馭固非世所望惻惻理歸權泛泛
秋浦長還尋甫里陸夏醉山陰王素冠斯馳贈喜知終
未忘余茲將遠適旅泊猶彷徨微風動虛碧初月照石
梁曠望對清景賦詩託陳郎茯苓思同煮夜雨共匡牀
列朝詩集載此詩至棗栗亦傾筐而止不知此處如何
可佳是必傳寫之訛未經較定故耳後之覽者不可不
亟為改正也

蕭閒館夜坐

隱几忽不寐竹露下泠泠青鐙澹斜月薄帷張寒廳燥
煩息中動希靜無外聆窅然玄虛際詎知有身形

走筆次陶蓮韻送葉參謀歸金華

手把玉芙蓉青天騎白龍出入人間世飛鴻蹋雪蹤瑤
草粲可拾羣峰森玉立璧月掛天南離離星斗溼君昔
在山時玉韞山有輝因同白雲出更與白雲歸白雲無
定處豈只山中住河漢共縈紆經天復東注金華牧羊
人遊戲不生嗔笑拂巖前石行看海底塵手調白羽箭

陋彼磨銅硯一語不投機歸歟寧再見士豈始隗乎全
趙匪相如項王疑亞父竟爾龍為魚擾擾何時已百年
聊寄耳良也報仇歸言從赤松子去山今幾年還山大
學仙天台司馬宅雲氣近相連

雙寺精舍新秋追和戎昱長安秋夕

秋暑晚差涼茗餘眠獨早清風振庭柯寒蛩吟露草晨
興面流水西望吳門道不知人事劇但見青山好

玄文館讀書

并序

玄中真師在錫山東郭門立靜舍號玄文館幽虛敞
朗可以閒處至順壬申歲六月余處是兼旬謝絕塵
事遊心澹泊清晨櫛沐竟遂終日與古書古人相對
形忘道接脩然自得也又西神山下有好流水味甚
甘冽與常水異館去西神山遠不出五里故得朝夕
取水以資茗荈之事居茲館讀書研道之暇時飲水
自樂焉乃賦詩曰

真館何沈沈寥廓神明居陽庭肅宏敞丹林鬱扶疎
瞻

言茲遊息脫屣榮利區檐檠初日麗池臺涼雨餘焚香
破幽寂飲水聊舒徐潛心觀道妙諷咏古人書懷澄神
自怡一作適意愜理無虛誰云黃唐遠泊然天地初迴首撫
八荒紛攘蚍蜉如願從逍遙遊何許崑崙墟

述懷

讀書衡茅下秋深黃葉多原上見遠山被褐起行歌依
依墟里間農叟荷篠過華林散清月寒水澹無波遐哉
棲遁情身外豈有它人生行樂耳富貴將如何

丙子歲十月八日夜泊閩門將還溪上有懷友仁

陸徵君

明發辭吳會移舟夜淹泊空宇垂繁星微雲暝前郭沈
沈抱冲素悄悄傷離索歸埽松逕苔遲君踐幽約

聽袁員外彈琴

并序

至正四年十一月袁員外來林下為留兼旬臘月十
七日快雪初霽庭無來迹與僕靜坐因取琴鼓之古
音蕭寥如茂松之勁風春壑之流冰員外時年八十

有二顏貌筋力未如四五十許人為言甫弱冠遭逢
盛明初宰當塗過九華山道逢神人與棗食之後數
數見夢寐間若冥感玄遇者負外韜耀蘊真仕祿以
自給不為人所知豈郭恕先之流歟為賦五言一首
郎官調綠綺谷雪賞初晴兩忘絃與手流泉松吹聲問
言一作年踰八十云嘗見河清掛帆望九華神人歛相迎
啖以海上棗歡愛若平生玄遇寧復得惜哉遺姓名

戊寅十二月丹丘柯博士過林下賦詩次韻酬答

積雪被長坂臥病守中林山川雖云阻舟楫有見尋傾
蓋何必舊相知亦已深驚風飄枯條清池冒重陰聯翩
雙黃鵠飛鳴綠水潯顧望思鬱紆徘徊發悲吟願言齊
羽翮金石固其心歡樂何由替黃髮期滿簪

己卯正月十八日與中屠彥德遊虎丘得客字

余適偶入城本是山中客舟經二王宅弔古覽陳迹松
陰始亭午嵐氣忽斂夕欲去仍徘徊題詩滿苔石

次韻陳維允姑蘇錢塘懷古四首

釀酒劒池水玉壺清若無揮盃送落月山鬼共歌呼松
間鐙如漆白骨漫寒蕪

耕鑿古隧穿乃吳桓王墓金鴈隨冷風黃腸畢呈露悲
歌異今昔踟躕緩歸步

仙人悲世換宴景在清都寒暑自來往英雄生釣屠錢
唐江畔柳風雨夜嘯烏

江山國破後弔古一經行輦路苔花碧御溝菰葉生古
跡今寧有新城江上橫

贈惟寅

隱几方熟睡故人來扣扉一笑無言說清坐澹忘機衣
上松蘿雨袖中南澗薇知爾山中來山中無是非三十
不娶妻四十不出仕逍遙巖岫間翳名以自肆何曾問
理亂豈復陳美刺高懷如漢陰終老無機事

對春樹

端憂對春樹影落身上衣美人手所成紉縫願無違步
庭悲往躅瞻景惜餘暉芳襟沾露溼蘭佩委風微凝思

自的的染澤尚依依
晨雞催夢短夜鵲逐魂飛
歡愛自茲畢憔悴損容輝

送馬生

送子淮南行繫舟江岸柳
翠影舞晴煙落我杯中酒
舉杯向落日春水浮天碧
時見白鷗飛雪光翻綺席
應笑披羊裘獨釣江邊石

寄楊廉夫

吳松江水春汀洲多綠蘋
彈琴吹鐵笛中有古衣巾
我

欲載美酒長歌東問津漁舟狎鷗鳥花下訪秦人

寄李隱者

南汀新月色照見水中蘋便欲乘清影緣源訪隱淪君
住鈿山湖綠酒松花春夢披寒雪去疑是剡溪濱

題畫贈岳道士

義興岳道士野鶴如長身我知彌明徒不是侯喜倫結
喉吟肩聳鐵脊霜髯新手中石棋子頭上漉酒巾久居
離墨山自謂無懷民喪亂不經意松陵留十旬香雲作

與衛長松為主賓既滋數畦菊復種二畝片樂哉以忘
死道富寧憂貧為我具舟楫相期桃花春

對酒

題詩石壁上把酒長松間
逶水白雲度晴天孤鶴還虛
亭映苔竹聊此息躋攀坐久日已夕
春鳥聲闌闌

尋友人不遇

洲渚多落英沂流尋遠山
輕舟載美酒搖蕩綠波間
俯咏拾瑤草遐思隘塵寰
賁緣忽失遇悵望遂空還

池蓮詠

廻翔波間風的歷葉上露清池結素彩華月映微步雲
陰花房斂雨歇芳氣度欲去拾明璫踟躕惜遲莫

徐氏南園對雨

櫻桃花欲落風雨莫淒迷忽憶郊園日竹林通磻西弱
蔓滋野援蘭葉長芳畦念我當時友蒿萊沒舊溪

題畫贈九成

故人郊掾史邀我宿溪船把酒風雨至論詩煙渚前晨

興就清盟思逸愛春天復遇武陵守共尋花滿川

至正十二年三月八日冒風雨過九成別溪舟中劉
德方郎官方舟煙渚留宿談詩明日快晴移舟綠水
岸下相與嘯咏仰睇南山遙瞻飛雲夾岸桃柳相廂
如散綺霞投芳芹而薦潔鴻山瓢而樂志九成出片
紙命畫眼前景物紙惡筆凡固欲騁其逸思大之騁
驥康莊也歐陽公每每云筆硯精良人生一樂書畫
同理余亦云焉時舟中章鍊師
岳隱者對奕吳老生吹洞簫

早春對雨寄懷張外史

林卧苦泥雨憂來不可絕掀帷望天際春風吹木末飛
蘿散成霧細草綠如髮念子獨高世南山修隱訣撫弄

無絃琴招邀青天月神安形不彫跡高行自潔思之不

可見飢渴何由歇願為鷺鵲翔南遊拂松雪

此詩集中又載改本

云林卧對雲雨憂來不可絕寒帷望庭蔭春風動林樾
飛蘿散成霧煙草綠如髮不見高世人飢渴何由歇神
鷺戲玄圃巨鱗偃溟渤爾亦碧巖中通形修隱訣燒香
庭竹淨洗研池苔滑取瑟和流泉操觚酌明月跡高行
亦苦冰梁忘芳潔何當住相尋拂石樓松雪今新本所
刻竟自神鷺戲玄圃句起而題無早春對雨字不知何
也所據

送呂養浩之紹興

賀監宅前路荷花今亦無空餘湖上月照見水中蒲送

爾作官幽絕處錢塘江頭飛柳絮聽事臨堤滿夕嵐時
有沙鷗自來去

送徐君玉

閩江之水清漣漪隔江名園多荔枝閩中女兒天下白
越波飛槳逐鳬鷺擢歌清綿洲渚闊蕩槳落日令人悲
蠻煙怪雨忽冥密將茅蒲葉相參差此中勝事不為少
徐郎遠遊牽我思

對梓樹花

去年梓樹花開時美人明璫坐羅幃今年梓樹花如雪
美人死別已七月梓花如雪不忍看沈吟懷思淚闌干
鳴鳩乳燕共悲咽柳綿風急煙漫漫

劉君元暉八月十四日邀余翫月快雪齋中命余
詩因賦

卷簾見月形神清疑是山陰夜雪明長歌欲覓剡溪戴
悵然停杯遠恨生爾營茅齋名快雪邀我吹笙弄明月
明星如銀浮翳消垂露成帷桂花發酒波蕩漾天河傾

笙聲嫋嫋秋風咽古人與我不並世鶴思鷗情迴愁絕
苦雨行

孟秋苦雨稻禾死天地晦冥龍怒嗔南鄰老翁卧不起
漏屋溼薪愁殺人自云今年八十剩力農一生茲始病
兩逢赤旱三遇水租稅何曾應王命吾今寧免身為魚
死當其時良可吁

餘不溪詞

并序

開玄館在餘不溪濱距溪無百步上清王真人所立

溪流冬夏盈演玉光澄映與他水特異故為名焉庚
午歲春因市藥過浙江趣便道將歸梅里俛斯水而
悅之沂流閒咏盥濯平津顧瞻壇宇近在東麓遂舍
舟造其下真人為出酒脯燕燕獻巖洞竟日乃返悠悠
徂歲忽已十有七寒暑矣余既為農畝畝身依稼穡
復邇政繁奔走州里欲為昔遊其可得乎鍊師遐騫
物表閒情夷朗周覽宇內將還真館余因仿像疇昔
之所覩極道山之清婉追賦短章以餞斯別若夫超

蹤溷濁逍遙玄邁蓋深志於是矣覽而咏言能無動
悲慨手

餘不溪水涵綠蘋微風吹波蹙龍鱗看山蕩漿不知遠
兩岸桃花飛接人

一作花間白鹿來迎人

溪迴路轉松風急竹林

華房霞氣溼忽逢道士頤而長疑是韓國張子房相期
飄拂紫煙裏下攬滄溟浮玉觴

醉歌行次韻酬李徵君春日過草堂賦贈

杜陵昔年有

一作昔聞杜陵之

茅屋浣花溪邊錦江曲古人不

見春風來桃李無言自山麓石牀蘚澀青泥乾決渠流

水夜潺湲可憐寶劍埋黃土空餘山月照波間今我不

樂空懷

一作懷往

古短世長年誰比數花下那知李白來山

鳥恣歌童亦舞酒酣大笑五情熱作相形求築巖說夷

齊相逝居首陽逍遙采薇飽芳潔勿歌虞夏神農詩賢

愚等是百年期魯連耻秦亦蹈海笑爾局促商山芝少

文壁間對圖畫莫待老來難命駕仰看翕忽浮雲馳安

得乘螭與之化漠漠楊花縈遠天迸壑晴雷驚醉眠李

侯神爽色不動手中

一作敲

茶雪落輕煙逢君此樂誠草

草便欲攜君臥煙島海上千年

一作秋

白鶴飛世人胡為

而自老

為曹僉事畫溪山春曉圖因題

荆溪之水清漣漪溪上晴嵐紫翠圍連舸載書煙渚泊
提壺入林春蕨肥身遠雲霄作幽夢手栽花竹映山扉
磯頭雪影多鷗鷺也著狂夫一浣衣

賦翠清硯

岳翁嘗寶翠濤石今我還珍翠濤硯翠濤泐泐生穀紋
雲章龍文發奇變米芾硯山徒自惜此硯顛應未曾見
我初避亂失神物玉蟾滴淚空悽戀珠還合浦乃有時
洗滌摩挲冰玉姿書舟輕迅逐鳬鷺喜出火宅臨清漪
松雪磨香淬毛錐天影江波闕碧滋一咏新詩開我眉
題張德常良常草堂

翠壁鄰丹竈青楓背草堂琴書聊卒歲麋鹿自成行澗
水流杯滑飛花入座香能無問津者及此繫舟航

遊善權洞

來窺善權洞一上李公樓水玦巖前引雲旌松際浮然
銚長不夜垂釣只虛舟欲讀吳朝刻真成冒雪遊

雪槎軒

已比溝中斷空思海上浮隨雲秋汎汎貫月夜悠悠無
路通河漢憑誰問女牛漂搖非有待吾道付滄洲

賦德機徵君荆南精舍圖

結廬溪水南勝事足幽探夏果落山雨春衣染夕嵐石

敢招鶴磴門，俛射蛟潭。日日紫歸夢，蕭條雪滿簷。

贈公遠

霜葉落欲盡，晚山看更青。躡將沙際屐，坐久水邊亭。俛仰已如夢，漂搖同泛萍。稻粱非所戀，黃鵠思冥冥。

張心遠訪郊九成因書以寄

州府今為掾，風埃多厚顏。香芹渾滿澗，去鶴未巢山。思逐春雲亂，心隨野水閒。張君應話我，樗散碧巖間。

荒邨

踽踽荒邛客悠悠遠道情竹梧秋雨碧荷芰晚波明穴
鼠能人拱池鷺類鶴鳴蕭條阮遙集幾履了餘生

寄虞子賢

天闊海漫漫崑山望眼寬桃源迷晉世松樹受秦官雨
蘚鹿迹遍霜梧鷺影寒封題數行字聊問竹平安

贈沈文舉

波光浮草閣苔色上春衣楊柳鷺唳遽

一作暗

櫻桃鳥啄

稀榮名非所慕登覽竟忘歸泝水宜修禊重來坐釣磯

己酉八月廿三日雨至廿六日乃開霽賦五言呈
德常

積雨琴絲緩沿階蘚碧滋
泥途方汨沒茅屋且棲遲
酒向鄰家貰杯從野老持
便應從此去海上候安期

畫江天晚色贈志學

不見呂君久題詩懷不忘
風聲渾落葉山影半斜陽
獨鶴來遲暮孤帆出渺茫
為圖秋色去畱寄讀書堂

垂虹亭

虛閣春城外澄湖暮雨邊飛雲忽入戶去鳥欲窮天林
屋青西映吳松碧左連登臨感時物快吸酒如川

題畫贈王仲和

曾住南湖宅于今已十年叢筠還自翳喬木故依然雨

雜鳴渠溜雲連煮朮煙何時重相過爛醉得佳眠

南湖陸玄

素高士幽居今王君仲和居之水木清華戶庭幽邃余
嘗寓其家四年豁然忘世慮也仲和以此幀索畫竹石
畫已并詩其上以寓悵悵之懷玄素仲和外
弟也故尤感余故人之思乙巳初月十七日

題元璞上人壁

蕭條江上寺迢遞白雲橫坐待高僧久時聞落葉聲鴟

夷懷往事

一作踟躕

張翰有餘情獨擢扁舟去門前潮未生

北里

舍北舍南來往少自無人覓野夫家鳩鳴桑上還催種

人語煙中始焙茶池水雲籠芳草氣

一作色

井牀露淨碧

桐花練衣掛石生幽夢睡起行吟到日斜

山園

春水鳬鷺野外堂山園細路橘花香棲棲身世書

一作畫

盈篋漠漠風煙酒一觴
豈謂任真無禮法也須從俗著
冠裳不營產業人應笑竹本桃栽已就行

林下遣興

眼見藤梢已過牆
手拈書卷復堆牀
閒臨水檻親魚鳥
欲出柴門畏虎狼
冠製不嫌龜殼小
衣裾新剪鶴翎長
從來任拙唯疎懶
一月秋陰不下堂

春日

閉門積雨生幽草
歎息櫻桃爛漫開
春淺不知寒食近

水深唯有白鷗來，即看垂柳侵磯石。已有飛花拂酒杯。

今日新晴見山色，還須拄杖蹋青苔。

雲林所居苔蘚盈庭，不容人跡，綠綺

可愛。每遇墜葉，輒令童子以鍼綴杖頭挑出，不使點壞。

二月十日玄文館聽雨

臥聽夜雨鳴高屋，忽憶陂塘春水生。何意遠林飢獨鶴，
若為幽谷滯流鶯。成叢枸杞還堪采，滿樹櫻桃空復情。
二月江頭風浪急，無機鷗鳥亦頻驚。

雪後過陳子貞隱居

陶公卜宅南邨裏快雪初晴思一遊樹辨微茫來獨鶴
櫓搖鼓側散輕鷗墨池繞溜春冰滿塵榻繙書夕照收
相見惘然如有失掉頭吟咏出林立

次韻薩天錫寄張外史

谷口路微山木合溼衣空翠不曾晴飢猿扳檻為人立
寒犬號林如豹聲小閣秋清聽雨臥長空日出採芝行
道心得失已無夢沐髮朝真候五更

送張外史還山

道士朝乘白鶴還樓臺金碧鎖空山
半天花雨飛幢節
萬壑松風雜珮環
丹井夜寒光剌剌
石壇春靜蘚斑斑
飄然便擬從君隱
分我玄洲一一作半間

寄張貞居

不但入城蹤跡少
南鄰野老見猶稀
狂歌鳴鳳聊自慰
舊學屠龍良已非
蒼蘚渾封麋鹿逕
白雲新補薜蘿衣
羊君筆札誰能繼
欲讀靈文一扣扉

贈別益以道書記

一笑相逢豈有期因懷西崦話移時李公祠畔

一作空堂裏

餘月陸子泉頭舊有詩旅思悽悽非中酒人情落落似

殘棋雲濤眼底三生夢鷗影秋汀又遠

一作別離

送寶南琛往往荆溪碧雲寺兼簡方厓

碧雲林壑杳重重此去風流似簡公春藥碓閒湍激下

吟秋

一作空山

蛩響月明中結茅擬候芝三秀眠鹿應遺地

一弓聞道重居開竹牖待予艇子過溪東

奉和虞學士寄張外史

華陽上館誰曾到，知有高人避世深。
當戶春雲團紫蓋，洗空花雨散青林。
丹臺篆跡龍蛇動，經閣松一作清聲鸞鶴吟。
念子離居消息遠，幾將書札寄遙岑。

春日試筆

喜看新酒似鵝黃，已有春風拂草堂。
二月江南初變一作破柳，扁舟晚下獨鳴榔。
苔生不礙山人屐，花發應連野老牆。
美酒已拚千日醉，莫將時事攪愁腸。
一作離

寄張天民先生

清溪演漾綠生蘋溪上軒楹發興新只欠竹陰垂北牖
儘多山色近南津湖魚入饌長畱客沙鳥緣階不畏一作

避人媿我萍蹤此淹泊片雲回首一傷神

居竹軒

翠竹如雲江水春結茅依竹住江濱階前迸筍從侵逕
雨後垂陰欲覆鄰映葉黃鸝還自語傍人白鶴亦能馴
遙知靜者忘聲色滿屋清風未覺貧

送張鍊師遊七閩

高士不羈如野鶴忽思閩海重經過
舟前春水他鄉遠雪後晴山何處多
鰈鯢卧雲芳草細鉤輶號樹野煙和
武陵九曲最清絕落日采蘋聞櫂歌

杭人有傳余死者貞居聞之愴然因賦此以寄

果園橘熟誰分餉茅屋詩成嬾寄將
衰謝皆傳余已死迂疎真與世相忘
夜分風雨雞鳴急天濶江湖雁影長
寥落百年能幾面論文猶及重銜觴

寄張德常

身世蕭蕭一羽輕
白螺杯裏酌滄瀛
逍遙自足忘鵬鷃
漫浪何須記姓名
石鼎煮雲聽夜一作雨
玉笙吹月和松聲
憑君為問張公子
曾到良常夢亦清

題張以中野亭

人境曠無車馬雜
軒楹只在第三橋
開門草色侵書幌
隔水松聲和玉簫
一榻雲山供夏簟
滿江煙雨看春潮
君能擷取飛霞珮
天際真人近可招

題孫氏雪林小隱圖

天地飄搖一短蓬
小窗虛白地鑪紅
脩然忽起稱雲夢
不定仍因柳絮風
鶴影襍簷上下鹿
迹散漫屋西東
杜門我自無干請
閒寫芭蕉入畫中

送杭州謝總管

南省迢遙阻北京
張公開府任豪英
守臣視爵等侯伯
僕射親民如父兄
錢廟有碑祠夜雨
岳墳無樹著秋聲
好將飲食濡飢渴
何待三年報政成

上巳日感懷

石梁破屋路欹斜，似華陽道士家。
漠漠春雲飛別鶴，潺潺夜雨雜鳴蛙。
閒看稚子翻書葉，時有鄰翁汲井花。
日莫傷心江水綠，共舟人已蹶飛霞。

贈張玄度時方喪內

吳松江水似荆溪，九點煙嵐落日西。
寂寂郊園寒食過，蕭蕭風雨竹雞啼。
蕙花委砌心應折，芳草歸途意轉迷。
曾得魯連消息否，春潮隨雨到長堤。

喜謝仲野見過

階下櫻桃已著花
窗前野客獨思家
故人攜手蹋江路
拄杖敲門驚夢華
藉草悲歌聲激烈
停杯寫竹字歌斜
新蒲細柳依綠
西北浮雲望眼遮

寄熙本明二首

在山無事入城中
每問歸樵得信通
松室夜鐙禪影瘦
石潭秋水道心空
幽扉獨掩林間雨
疎磬遙傳谷口風
幾度行吟欲相覓
亂流深澗隔西東

白首遙知得道餘
不聞詩思近何如
高齋夜雪同誰話

金史四庫全書
卷五十八
古木寒山獨自居夢裏只尋行去路愁時聊讀寄來書
夕陽溪上多飛鳥若個能看影是虛

寄盧士行

閨間浦口路依微笠澤汀邊白板扉照夜風鐙人獨宿
打窗江雨鶴相依畏途豈有新知樂老境一作景空思故

里歸擬問桃花泛春水船頭浪暖鰕魚肥

送徐子素

山館留君才一月梅花無數倚霜晴垂簾幽閣團雲影

貯火茶鑪作雨聲
深竹每容馴鹿卧
青山時與道人行
歸舟載得梁溪雪
惆悵鄰雞月四更

三月一日自松陵過華亭

竹西鶯語太丁寧
斜日山光澹翠屏
春與繁花俱欲謝
愁如中酒不能醒
鷗明野水孤帆影
鶻沒長天遠樹青
舟楫何堪久留滯
更窮幽賞過華亭

再用韻呈諸公

北窗高臥自清寧
煙霧衣裳雲錦

一作翠

屏舉世無知心

自得衆人皆醉我何醒
黃熊號野兵
埃黑白骨生
苔鬼
磷青舊宅荒
蕪時入夢
墨池誰訪子雲亭

次韻邵生

一作疎林遠岫圖
寓贈子素徵君

已從鷗鳥狎雲深
老我無機似漢陰
采采菊花猶滿地
蕭蕭霜髮不勝簪
南遊阻絕傷多壘
北望艱危折寸心
好在吳松江水上
青猿啼處有楓林

別章鍊師

方舟共濟春江濶
訪我寒煙菰葦中
鼓柁斜衝蘆葉雨

鈎簾半怯杏花風
仙人壇上芝應碧
玉女窗中桃未紅
擬趁輕帆數來往
縹壺不惜酒如空

寄養正

得君佳句清如玉
秋色驚人換物華
老境侵尋真有感
故園隔絕更興嗟
女蘿綠遍牽茅屋
烏桕紅明映落霞
欲酌一尊澆磊塊
幾時邀子過田家

贈岳松澗

曾訪神仙五粒松
澗泉流潤白雲封
林間蘿藦交青影

蔓一作

石上

一作水畔

菖蒲開紫茸煮石有方畱秘訣采苓

一作

芝何處覓行蹤岳君別我三千歲晚戲滄洲又汝

一作得再

逢

送僧遊天台次張外史韻

四明山水名天下師去那知客路遙雪霽驚鷹騰宿莽
月明寒鵲集疎條坐尋雲頂十峯石歸趁江頭八月潮
說與住山

一作寄語山中

光老子送賓也合過溪橋

過許生茅屋看竹

舟過山西已夕曛許生茅屋遠人羣鑿池數尺通野水
開牖一規留白雲煮藥煙輕衝竈出碓茶聲遠隔溪聞
可憐也有王猷興階下新移少此君

寄德朋

故人欲問梁鴻宅遺跡猶應杵臼存楓葉菊花秋瑟瑟
荒園廢圃雨昏昏農人掩舍春耕野縣吏催租夜打門
唯有德朋多遠思賦詩刻燭酒重溫

寄顧仲瑛

江海秋風日夜涼
蟲鳴絡緯尚練裳
民生惴惴瘡痍甚
旅泛依道路長
衰柳半敲湖水碧
濁醪猶趁菊花黃
知君習靜觀諸妄
林下清齋理藥囊

與伯雨登溪山勝槩樓

樓下清溪夏亦寒
溪頭箇箇白鷗閒
風回綠卷平隄水
林缺青分隔岸山
若士振衣千仞表
何人泛宅五湖間
絕憐與子同清賞
擬向雲霄共往還

和華以愚韻兼題所畫春山高士圖

扁舟溪上數來過白髮殘春奈我何
柳絮如煙迷曉浦杏花飛雪點春波
林扉有客圖丘壑石室何人帶女蘿
欲和華山高隱曲羈愁悽斷不成歌

風雨

風雨蕭條歌慨慷忽思往事已微茫
山人酒勸花間月秦女箏彈陌上桑
鐙影半窗千里夢泥塗一日九回腸
此生傳舍無非寓謾認他鄉是故鄉

故吾

縹緲青山日欲晡
瀾漫秋水興何孤
鶴歸城郭生新夢
塵掩圖書尚故吾
南畝藝苗傷碩鼠
北窗臨澗聽啼烏
醉歸倘乞封侯地
便復移家傍酒壚

二月廿二日潘子素王叔明來慰藉臨別為寫水
傍樹林圖并題

積雨開新霽汀洲生綠蘋
臨流望遠岫歸思忽如雲
竹石圖

雨過黃陵廟風生渭水波
當時卸帆處苔石倚喬柯

為曾高士畫湖山舊隱

厭聽殘春風雨卷簾坐看青山波上鷗浮天遠林間鶴
帶雲還

題畫

菴畫溪頭喚渡銅官山下尋僧水榭汀橋曲曲風林雲
磴層層

絕句四首次九成韻

我別故人無十日衝煙艇子又重來門前積雨生幽草

牆上春雲覆綠苔

斷送一生棋局裏
破除萬事酒杯中
清虛事業無人解
聽雨移時又聽風

沒逕春泥不出門
山烟江霧晝長昏
糟牀聲雜茅簷雨
破却陰寒酒自溫

郊子論詩冀北空
晤言千里意常同
待晴紫陌堪縈手
行咏山光水影中

至正十四年二月廿五日雨郊君九成賦絕句四首
云杏花簾幕看春雨深巷無人騎馬來獨有倪寬能

憶我黃昏踰屐到蒼苔春色三分都有幾二分已在
雨聲中牆東兩個桃花樹恨殺朝來一番風十日春
寒早閉門風風雨雨怕黃昏小窗坐對黃金鴨寂寞
沈香火自溫春寒時節病頭風惆悵年華逝水同世
事總如春夢裏雨聲渾在杏花中仇瓊岳宿高齋籌
鐙為寫春林遠岫圖并次韻四詩題畫上時夜漏下
三刻矣佩
韋齋中書

雨晴

江上白蘋風起波冷紋縈碧暮煙和織成一幅鴛鴦錦
零落紅衣遠恨多

絕句

醉喚吳姬舞蹋筵風闌花陣亦回旋愁生細雨寒煙外
詩在青蘋白鳥邊

賦宜遠樓

宜遠樓前春可憐數峰依約亂流邊若為倚劍崆峒外
回望齊州九點煙

別潘先輩

君來煙草正淒迷君去溪頭柳葉齊挂席中流竟東上
莫重回首向荆溪

重送初上人參禮光公

阿育王塢舍利存山氣無雪春冬溫蓮花臺近多羅樹
中有人談不二門

竹枝詞

并序

錄五

會稽楊廉夫邀余同賦西湖竹枝歌余嘗莫春登瀕
湖諸山而眺覽見其浦溆沿洄雲氣出沒慨然有感
於中欲託之音調以申其悲歎久未能成章也因覩
斯作為之心動言宣為詞凡八首皆道眼前不求工

也

錢王墓田松柏稀岳王祠堂在湖西西泠橋邊草春綠
飛來峰頭烏夜啼

湖邊女兒紅粉妝不學羅敷春采桑學成飛燕春風舞
嫁與燕山遊冶郎

阿翁聞說國興亡記得錢王與岳王日莫狂風吹柳折
滿湖煙雨綠茫茫

春愁如雪不能消又見清明賣柳條傷心玉照堂前月

空照錢塘夜夜潮

嗷嗷歸鴈度春江
明月清波鴈影雙
化作斜行第上字

長彈幽恨隔紗窗

倪高士詩集刻本係荆溪賽曦編集所載竹枝詞八
首叙次甚明新刻本止載四首又不載小序而于楊
鐵厓西湖竹枝詞所載雜見集中并列朝詩選所錄
二詩亦分兩處鐵厓所載四首王弟二首與此頗同
附記於此其詞云鵲鴝生長最高枝雁墻街將向北
歸天長水闊無消息只有空梁燕子飛湖邊女兒紅
粉妝不學羅敷朝采桑自從學得纖腰舞嫁與城西
遊冶郎愁水愁風人不歸昨夜水沒釣魚磯踡盡蓮
根終無藕著多柳絮不成衣桐樹元栽金井西月明
照見影離離不比蘇公堤畔柳烏鴉飛過鵝鴨樓

題畫

樓閣參差霞綺開
峰巒重複水縈迴
赤闌橋外垂楊下
步月吹笙向此來

吳中

一作蘇臺懷古

望中煙草古長洲
不見當時麋鹿遊
滿目越來溪上水
流將春夢過杭州

三月廿日題所寓屋壁

梓樹花開破屋東
鄰牆花信幾番風
閉門睡過兼旬雨

春事依依是夢中

六月五日偶成

坐看青苔欲上衣一池春水靄餘暉荒邨盡日無車馬

時有殘雲伴鶴歸

雲林子之生有一鶴飛集於林上後
避地江陰華亭鶴亦翔舞不去雲林

沒鶴去
不還

正月廿六日漫題

泖雲汀樹晚離離飲罷人歸野渡遲睡起香銷金鵲尾
獨聽疎雨打窗時

二月十五日雨作

風軒紅杏散餘霞
隄草青青桃欲花
寒食清明看又近
滿川煙雨亂鳴鳧

秋容軒

碧花翠蔓引牽牛
叢竹黃葵意更幽
不用田疇三日雨
已輸穠稔十分秋

題畫

南望銅官曉色新
三株松下一茅亭
何當濯足臨前澗

坐石閒書相鶴經

追和蘇文忠墨蹟卷中詩韻

奎章閣下掌絲綸清淺蓬萊又幾春
三十六宮秋寂寂
金盤露冷泣仙人

聞竹枝歌因效其聲二首

鈿山湖影接松江橘葉青青柿葉黃
要寫新愁一作寄

音信西風斷鴈不成行

江流不住楚山青船到潯陽幾日程
不忍寄將雙淚去

門前潮落又潮生

姚崇公嘗有詩云開元寺果常同宿笠澤湖邊每共過誰說江南名去後

更無人聽竹枝歌為先生作也

剖瓜仕女圖

月彎削破翠團團六月人間風露寒誰覓東陵故侯去
但知華屋薦金盤

晚照軒偶題

南湖春水碧於天夢作沙鷗狎釣船綠樹拂簷風雨急
覺來依舊北窗眠

畫竹贈申彥學

吳松江水似清湘
煙雨孤篷道路長
寫出無聲斷腸句
鷓鴣啼處竹蒼蒼

題秋江圖

長江秋色渺無邊
鴻鴈來時水拍天
七十二灣明月夜
荻花楓葉覆漁船

偶成

紫燕低飛不動塵
黃鸝嬌小未勝春
東風綠遍門前草

莫雨寒煙愁殺人

題畫贈僧

笠澤依稀雪意寒
澄懷軒裏酒杯乾
篝鐙染筆二更後

遠岫疎林亦耐看

雲林題畫詩最多其自題小畫一詩云逸筆縱橫意到成燒香弄翰了餘

生窗前竹樹依苔石寒雨蕭條待晚晴可謂自贊

素衣詩素衣內自省也
督輸官租羈繫憂憤思棄

田廬斂裳宵遁焉

至正乙未

素衣涅兮在彼公庭
載傷迨隘中心怔營
彼苛者虎胡

恤爾氓視氓如猺寧辟尤詬禮以自持省焉內疚雖曰
先業念毋盪失守而不遷致此幽鬱身辱親殆孝違義
屈蔚蔚荒途行邁靡通雖雖鳴鳳世莫之逢夕風淒薄
曷具有旦吁嗟民生實罹百患先師遺訓豈或敢忘簞
瓢稱賢樂道無殃予獨何為悽其悲傷空谷有芝窈窕
且廓爰宅希靜菽水和樂載戈載釣我心不忤安以致
養寤寐忘憂修我初服息焉優游

送甘允從北上

翔鴻縱高姿流水去不息枉道別友生揚舲望京國婉
嬾前途憩蕭條餘景匿神京衣冠會左右金張宅驅馬
流星繁垂軒春霧集嘉子玉質朗早通金閨籍行逢明
主顧入補詞臣職束帶向晨趨陪讌終日是芳年易為
曉所願崇令德英英白雲飛泐泐青山隔秋風應節起
萬里思親客遲子返舊居銜杯數相覲

答徐良夫

雲卧雨聲集庭樹颯以秋身同孤飛鶴心若不繫舟燕

組登松菌飽尊釃
磻流蘭芳日彫悴
吾生行歸休不作
樓蟻夢遊神鳳洲
青山澹相對白髮
忽滿頭仙去行
冉冉風鳴竹修修
諒哉伐木詩鳥嚶
尚相求居吳二十
載未及茲山遊
君才如鮑謝摘詞
亦云優歡然敬愛
客能不為爾留
桑土風所徹戶牖
何綢繆地無車馬
塵路轉巖穴幽
旣晴引飛屨回望
林間樓

秋夜

此詩從乾坤清氣
錄入與集中稍異

空林溽露氣疎鐘
時獨聞清夜息羣
動高居無俗氛恬

淡誠吾事榮名非所欣樂哉詠王風忘年棲白雲

八月廿三日芙蓉花下留南宮岳山人飲明日岳
山人過玉山南宮老矣不知復幾聚首觀花
聽琴情不能堪因賦長句并簡玉山

芙蓉著花已爛漫濁酒彈琴聊少停數聲別鵲隔江渚
一醉秋天空玉瓶况當賓客欲行邁忍使風雨卽飄零
攀條掇英重惆悵但願花開長不醒

寄王道士宗晉

王君舊隱地聞更結茅茨鶴氅春栽芋鵝羣雪泛池時
歌綠水曲不負碧山期夜雨生芳一作春草令人起夢思

送僧

聞說四明道山川似若邪去依阿育塢還宿梵王家野
井一作市封殘雪江船聚晚沙光公强健否持底作生涯

贈王光大

荆溪王隱士相見每從容借地仍栽竹巢雲獨傍松青
苔盤石淨嘉樹綠陰重約我同棲遁嵩高第幾峰

桂花

桂花留晚色，簾影淡秋光。
靡靡風還落，菲菲夜未央。
玉繩低缺月，金鴨罷焚香。
忽起故園想，泠然歸夢長。

題畫

甫里林居靜，江湖遠浸山。
漁舟衝雨出，巢鶴帶雲還。
漉酒松肪滑，敷茵楮雪閒。
春風一來過，似泊武陵灣。

寄張德常

卜宅近溪西，雲煙咫尺迷。
晝眠同野鶴，晨起候林雞。
舊

種松三徑春栽菊滿畦來禽與青李囊致不封題

六月六日盧氏客樓對雨呈維寅

無家隨地客小閣看雲眠涉夏雨寒甚似秋風颯然舞
驚悲鏡影飛鴈落箏絃好轉船頭去江湖萬里天

因吳國良過玉山草堂輒賦長句奉寄

玉山樹色隱朝陽更著漁莊近草堂何處唱歌聲歎乃
隔雲濯足向滄浪珍羞每送青絲絡佳句多投古錦囊
幾問權船尋好事辟疆園圃定非常

玉山主人欲延楊鐵崖於家塾鐵崖

報曰必得當世清雅高潔之士如倪雲林者以一札至即如約耳玉山因託雲林素相習者操舟出遊至玉山家玉山已搆別業悉如蕭閒清閑之樂雲林驚喜請見玉山玉山告以鐵厓之意欣然致書焉自是三人相與結歡往來無間

東林隱所寄陸徵士

寢扉桃李畫陰陰耕鑿居人有遠心一夜池塘春草綠孤村風雨落花深不嗔野老羣爭席時有遊魚出聽琴白髮多情陸徵士松間石上續幽吟

次韻郊九成見寄

郭外青山舊結廬
微茫野逕望中無
殘生竟抱煙霞癖
好事猶傳海岳圖
夜壁松風懸雅樂
秋池菊水酌商觚
儻從世事求玄賞
好趁輕舟看浴鳬

懷歸

久客懷歸思惘然
松間茆屋女蘿牽
三杯桃李春風酒
一榻菰蒲夜雨船
鴻迹偶曾畱雪渚
鶴情原只在芝田
他鄉未若還家樂
綠樹年年叫杜鵑

題竹

歎息真成汗漫遊
經春歷夏又嗟秋
林居已是能鳴士
顧我寧非不繫舟
江渚出吟聊自適
竹梢清淚浩難收
王孫莫道歸來好
芳草天涯恨未休

雲林詩句挺秀多可存者五言如簾蕪細雨溼桃李
春風寒湘葦間秋水風蓮墮粉衣卷簾微雨裏岸幘
晚風餘墨沼鵝羣白雲甯藥蕊紅山色排簷入江波
照眼明野竹寒煙外霜柯夕照邊七言如午夜月明
風滿帳千厓人靜鶴眠松春池雨後泉應滿庭樹雲
移影更長翳日長林藏伏虎際天春水浴輕鷗忽有
故人騎馬至即呼稚子出門迎煙邊去鳥莫山碧衣
上飛花春雨香溪船斫繪雲生松松室閒猿月滿枝
半席白雲臨碧澗四更落月掛長松圓棋終日對
急雨解帶六月如高秋即此數語可想見其人

題鄭所南蘭

秋風蘭蕙化為茅南國淒涼氣已消
只有所南心不改
淚泉和墨寫離騷

清明日風雨淒然舟泊東林西澣步過伯璇徵君

高齋焚香淪茗出示燕文貴秋山蕭寺圖展玩良

久因賦一絕

野棠花落過清明春事怱怱夢裏驚
倚櫂微吟沙際路

半江煙雨暮潮生

舊本作清明後題云野棠花落又清明楊柳青青人耦耕春物闌珊成底

事半江疎
雨莫湖生

卷五十八

國寶照磨有平野軒在揚州城郭中今寓吳十許
年矣至正丙午九月十一日在開元寺為寫
此圖並詩以贈

雪筠霜木影差差平野風煙望遠時回首十年吳苑夢
揚州依約鬢成絲

煙雨中過石湖三絕

煙雨山前度石湖一奩秋影玉平鋪何須更翦松江水

好染空青作畫圖

姑蘇城外短長橋
煙雨空濛又晚潮
載酒曾經此行樂
醉乘江月卧吹簫

愁不能醒已白頭
滄江波上狎輕鷗
鷗情與老初無染
一葉輕軀總是愁

自題設色山水贈孟膚徵君

秋潮夜落空江渚
晚樹離離含宿雨
伊軋中流間櫓聲
卧聽漁人隔煙語

十七日過與之洛澗山莊畱宿復大雪作及明起
視戶外巖岫如玉琢削竹樹壓倒徑無行蹤
飄瞥竟日至莫未已雪深尺餘賦詩畱別

世途縈往苒歲晏不知歸密雪竹林夜挑燈共掩扉稍
移神慮靜高詠玄言微遇此巖中賞初心悵多違

李徵君將還揚州因言沈郎官在吳下賦此以寄
二月桃始花淮南客還家階前疎雨落堂上春衣薄為
言沈約在吳中玉壺青絲酒如空春風相過蕙草綠芳

菲滿堂樂未終

送元度北游

荷鋪空林春雨餘
艤舟沙岸燕飛初
去尋天上仙人佩
肯顧山中隱者居
霜月四更提劍舞
田園二頃帶經鋤
蘭榮柳密南簷下
佇子雲間枉尺書

悼頂山寺清上人

杯渡前溪見水源
偶來佩芷服蘭蓀
香臺猶帶山窗影
經卷長依松樹根
雲起晴峯還有觸
雪消春野不留痕


倏然我已忘言說翠竹黃花自滿園

薩仲明為丞相府掾時僦居京師名其軒曰半野
後買宅延陵亦揭是名于軒因雨宿其下遂
為賦詩云

何意開軒名半野身存魏闕思江湖斜侵瓜圃通花藥
稍傍薇垣近竹梧千里秋風催斫鱸九霄晨露浥飛甍
如今別買荒城宅自埽風林候野夫

題所畫雲林小景圖

赤城霞暖神芝秀
洞裏桃花不記春
何事却將山水腳
鍾陵市上踏紅塵



元詩選初集卷五十八